

四庫全書

史部

欽定四庫全書

金佖粹編卷十三

宋 岳珂 撰

家集四

奏議中

辭鎮南軍承宣使第三奏

中衛大夫武安軍承宣使神武副軍都統制臣岳飛狀
奏臣今月十五日准樞密院劄子奉聖旨除臣正任承

宣使充江南西路沿江制置使臣已兩具辭免伏蒙聖
慈降詔不允者榮命下頒驚魂頓失辭章上達帝命不
俞雖臣受之不慙恐輿情之未協輒陳懇悞方切憂惶
復蒙天語之丁寧告戒備至愈使臣心之感戴進退靡
安敢事虛辭仰違明詔竊念臣將天威而遠討致僭據
之一空妙策竒謀悉遵聖訓破堅却敵咸得士心臣實
何能輒膺殊賞既慙過量復付重權是誠叨冒以踰勲
非謂謙辭而避寵况九江乃控扼之重地連武昌爲襟

帶之要衝用得其人周瑜所以敗曹公於赤壁禦失其
策隨何所以取黥布於湓江難使非才濫膺此寄伏望
吞此咽喉之付以屬大臣俯從螻蟻之誠使安愚分所
有上件恩命乞賜寢罷干冒天威死有餘罪謹錄奏聞
伏候勅旨

辭男雲特除保義郎閤門祇候奏

鎮南軍承宣使神武副軍都統制江南西路沿江制置
使臣岳飛狀奏臣今月十七日准樞密院劄子奉聖旨

除臣男雲保義郎閤門祇候者伏念臣寒陋無堪上感聖恩備負軍事未有涓埃之力以報國家况臣男雲俾從戎伍未立寸效豈足仰副異眷實不遑安伏望特賜寢罷以安愚分謹錄奏聞伏候勅旨

乞罷制置職事奏

鎮南軍承宣使神武後軍統制江南西路舒蘄州兼荆南鄂岳黃復州漢陽軍德安府制置使臣岳飛狀奏契勘飛昨蒙聖恩除臣江南西路舒蘄州制置使臣不敢

辭免伏恐朝廷別有使令實不自安方具陳控繼蒙除
臣荆南鄂岳黃復州漢陽軍德安府制置使令臣收復
襄陽等六郡臣深體國事之急憤激于懷是以承命出
征不暇辭請今來並已收復了當竊念臣人微望輕難
任斯職欲望特降睿旨委任重臣經畫荆襄令臣罷制
置使職事依舊充神武後軍統制庶得少安愚分謹錄
奏聞伏候勅旨

辭建節劄子

鎮南軍承宣使神武後軍統制江南西路舒蘄州蕪荆
南鄂岳黃復州漢陽軍德安府制置使臣岳飛劄子奏
臣伏蒙聖恩除臣清遠軍節度使湖北路荆襄潭州制
置使依前神武後軍統制特封武昌縣開國子食邑五
百戶伏念臣賦資凡下才不逮人旄節之崇實匪序遷
之比在於踈逖尤非宜據伏望聖慈追寢誤恩以安徽
分庶免顛隳之患實出生成之賜取進止

乞侍親疾劄子

鎮南軍承宣使神武後軍統制江南西路舒蘄州兼荆
南鄂岳黃復州漢陽軍德安府制置使臣岳飛劄子奏
臣輒具危懇仰瀆睿聰臣愚慙之跡奮身單微初無尺
寸之先容獨賴聖明之特眷雖捐軀致命曾不足以仰
酬恩遇之絲毫思報之心寧有窮已臣近者奉命收復
襄漢去家遠涉六月餘日臣老母姚氏年幾七十侵染
疾病連月未安近復腿脚注痛起止艱難別無兼侍以
奉湯藥人子之心實難安處伏望聖慈察臣悃悞無他

規避暫乞許臣在假以全侍奉之養將本軍人馬權暫令統制官王貴張憲主管候臣老母稍安依舊管幹職事恭聽驅策結草銜環誓圖報効冒犯雷霆之威臣無任戰懼激切之至取進止

辭建節第二劄子

鎮南軍承宣使神武後軍統制充江南西路舒蘄州兼荆南鄂岳黃復州漢陽軍德安府制置使臣岳飛劄子奏臣契勘先具辭免江南西路舒蘄等州制置使蒙恩

降詔不允續准省劄除臣清遠軍節度使湖北路荆襄
潭州制置使臣於今月初二日即具辭免干犯天聰至
今未蒙施行伏念臣謏薄之資無足比數誤辱聖恩備
員軍事雖竭疲駑殊無補報空糜餼餼朝夕靡遑若更
貪戀寵榮不惟取誚人言亦於臣之冒濫實所不安伏
望睿慈洞察檢會臣前所奏追寢成命早降指揮令臣
依舊官資充神武後軍統制庶安愚分未致顛躋終圖
報効荼瀆天威臣無任震汗之至取進止

繳節度告奏

鎮南軍承宣使神武後軍統制充江南西路舒蘄州兼
荆南鄂岳黃復州漢陽軍德安府制置使臣岳飛狀奏
契勘近蒙降到臣清遠軍節度使湖北路荆襄潭州制
置使告一軸臣實有愚悃已累行具奏不敢祇受伏望
聖慈速賜追還以安微分謹錄奏聞伏候勅旨

辭建節第三劄子

鎮南軍承宣使神武後軍統制充江南西路舒蘄州兼

荆南鄂岳黃復州漢陽軍德安府制置使臣岳飛劄子
奏臣比具辭免清遠軍節度使蒙恩降詔不允之再瀝
肝膽之誠仰瀆天聽乞賜追寢成命今月十五日伏蒙
聖恩再降詔不允臣寒陋無堪才術凡下區區武弁不
當輒具汎辭控免惟是旄節之重實匪所堪事干國政
不容冒受惟望早賜追還以安愚分取進止

辭建節第四劄子

鎮南軍承宣使神武後軍統制充江南西路舒蘄州兼

荆南鄂岳黃復州漢陽軍德安府制置使臣岳飛劄子
奏臣伏准尚書省劄子以臣辭免清遠軍節度使特降
聖旨不允不得再有辭免伏念臣猥以不才幸蒙委使
敢謂涓埃之効遽叨旄節之榮若不屢辭干瀆天聽不
惟叨冒寵榮不遑安處方今戎馬侵擾而誤恩若加於
人深慮名器不重勸賞不實何以厭服公議臣雖三貢
丹誠宸衷未允敢望聖慈察臣之愚實非矯飾所有告
命見在鄂州軍資庫寄納伏乞特賜追還以安愚分取

進止

劾劉康年僞奏乞恩澤奏

清遠軍節度使神武後軍統制充湖北路荆襄潭州制
置使臣岳飛狀奏臣近讀池州送到朝報內一項係臣
畫一陳乞臣母封國夫人第二項次男雷乞授文資第
三項乞江州廬山東林禪寺住持僧慧海佛禪師事臣
伏讀不勝驚駭蓋臣先於鄂州駐劄日遣本軍提舉事
務武功大夫劉康年將收復襄漢等賞功文字前去行

在投進臣以鄂州去行在遙遠恐往復遲緩又臣本軍
軍器闕少戰馬倒死者甚多遂令劉康年齎空名印紙
因便將帶陳乞軍器戰馬等事不謂劉康年將前項印
紙擅行書填陳乞臣之私事竊念臣冗賤凡才誤蒙陛
下擢任兢兢旦夕每虞不稱如臣近者蒙恩以收復襄
漢六州寵加旄節臣凡五具懇辭不敢祇受慮或取誚
公論有玷清朝敢謂康年遽上此請方當國家多事之
際陛下宵衣旰食親御六師經理戎政臣雖至愚極陋

豈不知捐身効命少圖補報况復敢以私門猥瑣希求
恩寵臣若不披露肝膽力爲辨雪天下其謂臣何伏望
陛下察臣悃愾實未嘗敢萌此意乞將上件恩數早賜
追寢仍將劉康年妄行書填印紙情罪明正朝典所有
臣不合令劉康年將帶空名印紙事理見在本軍待罪
伏乞同賜黜責施行謹錄奏聞伏候勅旨

再乞寢罷劉康年偽乞恩澤劄子

清遠軍節度使神武後軍統制充湖北路荆襄潭州制

置使臣岳飛劄子奏契勘臣近於正月初一日嘗具奏
聞爲本軍提舉一行事務官武功大夫劉康年妄行書
填印紙乞母封國夫人次男雷換文資僧慧海禪師事
乞賜追寢仍將劉康年妄行書填印紙情罪明正朝典
所有臣不合令劉康年將帶印紙事理臣見在本軍待
罪乞同賜黜責施行去後今月十七日准尚書省劄子
正月八日三省同奉聖旨岳飛放罪劉康年罷神武後
軍提舉一行事務依衝替人例施行係事理重仍追奪

收復襄漢等賞飛母封號係是特恩可依已降指揮餘
令改正臣以猥瑣之資曲荷天地廣大之恩終不加罪
保全微臣臣雖殞身無以仰報聖德萬分之一重念臣
奮跡單微今來濫厠承流於法母已是當封淑人遭際
陛下實爲榮幸豈敢踰分過有邀求前三事上感睿照
特賜辨明皆已施行獨有臣母國夫人號未蒙改正竊
惟國家封爵自有彛制豈可躡等超遷有紊舊章若因
劉康年妄有陳請陛下必欲以此封臣之母不惟臣終

不違安亦於公論不以爲允伏望聖慈洞察憐臣懃懇
之誠俯從所欲將臣母特封國號事速賜追還以正名
分取進止

貼黃

如以爲特恩不可復奪乞將飛旄鉞恩數追
寢回授施行庶幾不致濫受伏乞睿照

辭男雲雷除閣職劄子

清遠軍節度使神武後軍統制充湖北路荆襄潭州制
置使臣岳飛劄子奏臣今月十一日准尚書省劄子奉

聖旨除臣男雲閣門宣贊舍人雷閣門祇候伏念臣寒
陋之資遭際聖明恩紀過厚比者入覲天光荐叨異數
顧雖捐軀致命莫報萬分今者寵眷日來又及賤息念
臣何功冒茲優渥成命初頒驚悸失措寔惟臣么麼賤
微凌躡已極而父子僥冒公議尤所不容陛下如欲始
終保全願收還誤恩俾安愚分庶幾不犯貪進之戒獲
遣他日之譴取進止

乞宮祠劄子

鎮寧崇信軍節度使神武後軍都統制荆湖南北襄陽
府路制置使臣岳飛劄子奏比具誠懇冒犯天聰以荆
襄三路目今盜賊屏息乞罷制置使職事以安愚分未
蒙俞允竊念臣自收復建康相繼六年正當大暑討捕
寇攘雖臣子義當捐軀効命報稱之時固不應復有披
陳然臣自收捕曹成入廣漸染瘴癘後來屢中暑毒每
至夏月疾間發作兩目赤昏飯食不進加之老母別無
兼侍病既在身母且垂白若臣貪冒寵榮不知進退非

惟臣所不安又以臣所統軍馬不少方陛下恢復故疆
奉迎二聖宜選賢能建圖事功而臣至愚極陋豈可久
濫兵權以妨豪傑之路情至迫切實非緣飾誕妄上欺
天聽欲望聖慈察臣之心本非避事除臣一在外宮觀
差遣如犬馬之年未殞他日尚可以備員邊面以受驅
策伏乞俞允早賜降付施行不勝幸願紊瀆宸扆臣無
任震汗激切之至取進止

乞宮祠第二劄子

鎮寧崇信軍節度使神武後軍都統制荆湖南北襄陽
府路制置使臣岳飛劄子奏臣於六月十八日嘗具奏
劄冒犯天聰惟切震懼朝夕恭俟宸命今月十九日准
尚書省劄子奉聖旨岳飛已平湖湘見措置上流事務
責任繁重所請不允仍不得再有陳請者伏念臣起身
田野勢援孤單荷陛下天地父母之恩曲垂覆育雖臣
捐軀効死豈足以圖報萬分之一臣前所請固非忍爲
亦非所願實以臣垂白之親別無兼侍年來多病頗覺

羸瘠又臣先所染瘴緣冒暑毒今亦未瘥雖平居無事
猶恐不能任責況今日上流形勢所繫至重若非智謀
宏遠勇略過人者安能分陛下宵旰之憂仰副委寄如
臣不才冒濫寵榮加以抱疾而不知止終恐有悞使令
上貽陛下憂顧伏望聖慈察臣愚懇不敢飾辭早賜俞
允除臣一在外宮觀差遣苟免顛躋實出生成之賜取
進止

乞宮祠第三劄子

鎮寧崇信軍節度使神武後軍都統制荆湖南北襄陽
府路制置使臣岳飛劄子奏先具誠懇冒瀆天聰乞一
在外宮觀差遣准尚書省劄子奉聖旨不允仍不得再
有陳請者伏念臣起自白丁誤蒙器使仰荷聖慈委曲
異眷雖父母之愛其子何以復加顧臣之事陛下豈不
願殫竭疲駑以畢此生仰圖報効况今防秋是時詎敢
託以他事覲安閒退實緣臣老母垂白多病又臣漸染
瘴疾四肢墮廢兩目昏赤而臣職掌兵戎繫國利害莫

大於此臣若貪冒榮寵昧於進退不哀鳴控告於君父
在臣一身固不足惜重念朝廷付以上流責任不輕恐
致顛隳有悞委寄伏望睿照矜其愚悃別無規避特降
指揮檢會臣前所陳請早賜俞允不勝幸甚取進止

辭檢校少保第二劄子

鎮寧崇信軍節度使神武後軍都統制荆湖南北襄陽
府路蘄黃州制置使臣岳飛劄子奏臣比具辭免檢校
少保恩命事今月十五日伏蒙聖恩曲降詔諭未賜俞

允臣義有未盡跼蹐靡遑輒敢再泚丹誠仰干淵聽伏
念臣本無才術誤膺眷渥未能平定中原掃除僭竊以
副陛下削平禍亂之闕

1. 2. 3. 4. 5. 6. 7. 8. 9. 10.

ADDENDUM

10

止

辭招討使第三劄子

鎮寧崇信軍節度使神武後軍都統制荆湖南北襄陽

府路蘄黃州制置使臣岳飛劄子奏臣比兩具辭免招
討使恩命今月十六日准尚書省劄子奉聖旨依已降
詔旨不允不得再有陳請者伏念臣才術空疎智識凡
下方懇辭檢校少保之恩豈謂復進招討之任荐膺眷
渥撫已驚惶切惟閭外之重責任非輕自匪德望服人
韜略邁衆何以仰副陛下遴選委寄之意如臣不才曷
足當此伏望聖慈察臣之衷實欲少安分守早賜追還
成命庶叶師言取進止

金佗稗編卷十三

欽定四庫全書

金佖粹編卷十四

宋 岳珂 撰

家集五

奏議中

辭檢校少保第四劄子

鎮寧崇信軍節度使神武後軍都統制荆湖南北襄陽
府路蘄黃州制置使臣岳飛劄子奏臣比具辭免除臣

檢校少保恩命今月初一日再准尚書省劄子奉聖旨
依已降詔旨不允不得再有陳請者伏念臣已三貢辭
章出于誠悃冒犯天威罪不容赦聖恩廣大一賜溫詔
兩降劄命捫心揣分感極涕零伏念臣草芥固陋備數
戎昭曾無尺寸之功仰報天地之德竊以亞保之位實
預三孤之貴所以賞有功而進豪傑也如臣何人輒膺
斯寵是以心不自安終難冒受不避譴誅再伸前懇非
敢徒爲辭遜伏望聖慈矜察愚衷早還成命庶令臣少

安分守臣不勝處祈俟命之至取進止

辭宣撫副使劄子

檢校少保鎮寧崇信軍節度使湖北襄陽府路招討使
兼本路營田使臣岳飛劄子奏臣五月十八日准御前
金字牌遞到樞密院劄子樞密院奏勘會岳飛已降指
揮除湖北京西南路宣撫副使奉聖旨疾速兼程前去
鄂州措置軍事者臣聞命震驚罔知所措前既叨受招
討使不容牢辭又蒙聖恩授以前件差遣切念臣一介

寒賤誤膺器使顧土宇恢復之迹未見尺寸而厚恩醲
賞涯分已踰且以宣撫之重名實寄專征之大事自非
廊廟邇臣勲伐高世者豈當冒躡而居異時付託失人
或誤驅策雖粉臣骨曷足以謝陛下兼招討使權不爲
不重若更加以甚高非常之寵必起負乘斯奪之悔所
有宣撫副使恩命實難祇受伏望追寢誤恩庶安愚分
臣無任悚懼恭聽宸命之至取進止

辭母亡格外賻贈及應辦喪事奏

草土臣岳飛狀奏臣准御前金字牌遞到尚書省劄子
二道奉聖旨岳飛母身亡已降指揮起復於格外特賜
銀絹一千匹兩令戶部支給所有葬事令鄂州協力措
置施行臣上荷聖恩惟知感泣契勘臣今般挈家屬扶
護母喪已至江州瑞昌縣擇定江州界營葬臣以月俸
之餘粗足辦集所有上件恩數并格外賻贈伏望聖慈
併賜寢罷庶安愚分謹錄奏聞伏候勅旨

乞終制劄子

草土臣岳飛劄子奏臣今月十二日至江州瑞昌縣界
准樞密院奏勘會岳飛丁母憂已擇日降制起復緣目
今人馬無人主管及見措置進兵渡江不可等待奉聖
旨先次行下岳飛特起復仍日下主管軍馬措置邊事
不得辭免伏念臣孤賤之迹幼失所怙鞠育訓導皆自
臣母國家平燕雲之初臣方束髮從事軍旅誓期盡瘁
不知有家自從陛下渡河以來而臣母淪陷河朔凡遣
人一十八次始能般挈得脫敵禍驚悸致疾遂以纏綿

臣以身服戎事未嘗一日獲侍親側躬致湯藥之奉今者遭此大難荼毒哀苦每加追念輒欲無生而陛下恩眷有加即命起復在臣么微固深銜戴然臣重念爲人之子生不能致菽水之歡死不能終衰經之制面顏有覩天地弗容且以孝移忠事有本末若內不克盡事親之道外豈復有愛主之忠臣已般挈扶護前來欲於江州或南康軍界營葬伏望聖慈矜憐餘生許終服制取進止

辭格外賻贈銀絹劄子

草土臣岳飛劄子奏比蒙聖恩以臣母身亡特賜銀絹一千匹兩即具懇免今月初一日准御前金字牌遞到尚書省劄子奉聖旨不允伏念臣遭遇聖眷過於山岳感激之心惟極涕泗今已安葬了當種種辦集皆自陛下恩被之所及所有前項銀絹實難重疊祇拜伏望特賜寢罷取進止

乞終制第二劄子

草土臣岳飛劄子奏准樞密院劄子勘會臣母魏國太夫人姚氏身故已降指揮起復仍日下主管軍馬職事不得辭免仍具已供職月日聞奏臣契勘除已具辭免奏聞外伏望聖慈檢會所奏特許臣終制取進止

乞終制第三劄子

草土臣岳飛劄子奏近於四月十二日具奏辭免起復檢校少保武勝定國軍節度使湖北京西路宣撫副使今月初一日准御前金字牌遞到尚書省劄子奉聖旨

不允令學士院降詔仍不得再有陳請依已降指揮日
下主管軍馬措置調發不致少失機會者伏念臣叨荷
聖恩實倍倫等惟期盡忠庶圖報稱緣臣老母淪亡憂
苦號泣兩目遂昏方寸亦多健忘自揆餘生豈復尚堪
器使非敢獨孝于親而於陛下不竭其忠正謂灾屯如
此不能任事况臣一介右列若學術稍優謀略可取亦
當勉強措置調發臣於二者俱乏所長今既眼目昏眊
又不能身先士卒賈作銳氣苟不罄瀝血誠披告陛下

則他日必致顛隲上辜委寄伏望睿慈俯察孤衷許臣
終制取進止

目疾乞解軍務劄子

起復檢校少保武勝定國軍節度使湖北京西路宣撫
副使兼營田使臣岳飛狀奏臣先爲目疾昏痛不能視
物在假服藥醫治累奏乞致仕將宣撫司事務權令參
謀官薛弼參議官李若虛管幹已申奏朝廷聽候指揮
去訖未蒙回降指揮十月十五日夜據參謀官薛弼傳

到御前劄子一封付岳飛係金字牌降到內係黃紙臣
遂拆開認是宸翰臣即時遙拜跪領不覺感激涕淚臣
平日切切思報陛下之心惟冀當此大敵少展區區適
以病目轉覺昏暗臣私心不勝痛憤又於十六日據薛
弼申累准金字牌降到御封樞密院劄子催促全軍人
馬前去江池州稱已勾抽襄陽等處軍馬前來猶恐遲
緩已整棚在寨軍馬止候兪請錢糧俵散衣賜了當先
次起發臣比在假每日連併服藥全未見效伏望睿慈

檢會臣累奏事理速賜施行庶幾不悞國事取進止

辭太尉劄子

起復檢校少保武勝定國軍節度使湖北京西路宣撫副使兼營田使臣岳飛劄子奏今月二十五日進奏官報內降白麻一道除臣起復太尉依前武勝定國軍節度使充湖北京西路宣撫副使兼營田使加食邑五百戶實封二百戶臣聞命震驚莫知所措伏念臣本無寸長誤膺器使且陛下以太上梓宮未還作興文武雪

恥于敵高名大爵正當謹與以激厲天下而臣何功率
先濫及伏望聖慈特垂天鑒察臣悃悞元非飾辭追還
大命庶幾微分少安不陷清議臣仰冒天威不勝惶懼
隕越之至取進止

辭太尉第二劄子

起復檢校少保武勝定國軍節度使湖北京西路宣撫
副使兼營田大使臣岳飛劄子奏臣昨已具奏乞追寢
太尉恩命於今月二十六日准右武郎同知閤門事兼

客省四方館事幹辦御前忠佐軍頭引見司潘永思齋
賜到告命一軸螻蟻之誠未回天聽不免再瀝忱懇伏
念臣頃自天下兵興時實有志於奮張皇威削平僭亂
以爲外侮不滅臣死不瞑初不敢萌覬覦高爵厚祿之
念既而誤蒙陛下使令付以兵柄責任以來荏苒積年
城郭人民之蹂迄無寧日而臣之官職歲遷月轉豈不
有負初心兼臣見今官職不爲不崇豈容一向叨竊不
自愧恥伏望聖慈特賜哀矜察臣愚衷收還大命庶令

臣得勉力事功以酬素抱以報厚恩不犯盈滿顛隳之戒所有告命臣未敢祇受見寄納平江府軍資庫取進止

乞免立新班劄子

起復檢校少保武勝定國軍節度使湖北京西路宣撫副使兼營田使臣岳飛劄子奏據幹辦官于鵬申准行在閤門關已降制岳飛除太尉依前武勝定國軍節度使湖北京西路宣撫副使二月二十五日奉聖旨不候

正謝令立新班臣已辭免外所有合赴朝殿起居乞立舊班取進止

辭男雲轉三官劄子

起復檢校少保武勝定國軍節度使湖北京西路宣撫副使兼營田使臣岳飛劄子奏臣伏觀聖旨岳雲特轉三官契勘臣男雲見充本司書寫機宜文字自有本職功狀內合乞推恩等第若更叨冒今來恩數似出無名非所以示將士大公至正之道也所有上件恩命實不

敢令雲祇受伏望聖慈特降睿旨速賜收還不勝幸甚
取進止

辭太尉第三劄子

起復檢校少保武勝定國軍節度使湖北京西路宣撫
副使兼營田使臣岳飛劄子奏臣近兩具奏乞追寢太
尉恩命今月二十九日准尚書省劄子二月二十八日
奉聖旨依已降詔旨不允不得再有陳請令日下祇受
臣一介么微言語鄙淺不能上格天聽用敢不避再三

荐控誠悃臣頃以目疾廢事日久近者商號賴蔡之戰
皆由仰遵聖訓遂致將士竭力在臣實無寸功且太尉
掌武之官授非其人則不足以爲今日右武之勸臣若
謬居不辭是因臣一已而怠天下伏望聖慈特回淵鑒
收還誤恩令臣只以見官待罪軍旅庶幾天下始知大
官之爲可重不累陛下立政惟人之明天下幸甚取進
止

辭太尉第四劄子

起復檢校少保武勝定國軍節度使湖北京西路宣撫副使兼營田使臣岳飛劄子奏臣比三具奏乞追寢恩命今月二日准尚書省劄子二月三十日三省同奉聖旨依累降詔旨不允不得再有陳請臣仰荷聖慈詔諭諄復然臣實以私情迫切不容冒進竊念臣雖無他長粗知義命平居服食器用每安於敝陋正恐綿薄不堪祿賜之厚徒取釁青臣伏自去春丁家憂棘不復敢有榮官之念繼以目疾就醫至今其天賦之薄即此可見

臣若復尚貪寵數不自退省將恐灾疢之來不特今日
伏望聖慈特回天聽收此誤恩全臣知止之節臣實幸
甚臣疊犯天威不勝惶懼顛越之至取進止

辭男雲轉三官第二劄子

起復檢校少保武勝定國軍節度使湖北京西路宣撫
副使兼營田使臣岳飛劄子奏臣近具奏辭免男雲特
轉三官恩數今月二日准尚書省劄子奉聖旨不允伏
念臣本以凡材誤蒙陛下付以方面若臣不能與士卒

一律則亦不能整齊其心昨者之戰士卒冒犯矢石有斬將陷陣立奇功者臣方列上事狀得霑一級而男雲何從趨進崇資臣正恐士卒有無功之謗陛下致濫予之譏且陛下方謹惜名器以磨厲天下將紹復大業而乃因臣私恩廢公議臣誠不自安伏望聖慈特降睿旨收還上件恩命臣父子幸甚取進止

辭開府劄子

太尉武勝定國軍節度使湖北京西路宣撫使兼營田

大使臣岳飛劄子奏臣正月二十四日准都進奏院遞到白麻一道除臣開府儀同三司加食邑五百戶食實封三百戶者臣初捧制文尚懷疑惑豈謂非常之典遽及無功又於二月十四日准本司往來幹辦官王敏求差人齎到前件告一軸乃知朝廷以強敵歸疆而將閫之寄例進優秩不惟臣一已私分愈切驚惶至於將士三軍亦皆有覩面目伏念臣奮身踈逖叨國顯榮每懷尸素之憂未効毫分之報豈可因此霈澤遂乃濫預褒

陞伏望聖慈特此睿斷毋嫌反汗亟寢誤恩所有告命
臣不敢祇受已令本司簽廳牒鄂州寄收以待朝廷追
取外冒犯天威不任激切俟命之至取進止

貼黃

臣待罪二府理有當言不敢緘默夫敵情姦
詐臣於面對已嘗奏陳切惟今日之事可危而不
可安可憂而不可賀可以訓兵飭士謹備不虞而
不可以行賞論功取笑強敵事關國政不容不陳
初非立異於衆人實欲盡忠於王室欲望速行追


寢示敵人以不可測之意萬一臣冒昧而受將來
敵若叛盟則似傷朝廷之體仍望以此貼黃留中
不出保全臣節臣不勝至情伏乞睿照

辭開府第三劄子

太尉武勝定國軍節度使湖北京西路宣撫使兼營田
大使臣岳飛劄子奏臣契勘已具辭免除臣開府儀同
三司加食邑五百戶食實封三百戶恩命今月二十七
日蒙降到詔書不允者臣近者累犯天威力辭恩寵庶

幾陛下洞燭危懇終賜矜從而溫詔諄諄未回睿聽跼地籲天不知所措夫爵賞者人君所以爲厲世磨鈍之具人臣得之所以榮耀鄉里而顯貴宗族也誰不欲貪多而務得哉然得所當得固以爲榮受所非受反足爲辱伏念臣奮迹羈單被恩優腆使臣終身只守此官已踰涯量豈可分外更冒顯榮遂速顛躋雖陛下推天地至寬之量在所兼容而微臣抱金石圖報之心寧無自愧所有臣爲將不效獻言悖理之實臣於累奏中固已

縷陳更不敢諄復紊煩聖聽伏望陛下檢會臣累次劄
子追寢成命特降俞音庶使微臣少安愚分取進止



金佗稗編卷十四

欽定四庫全書

史部

金佖稗編卷

十五至
二十二

詳校官編修臣范來宗

刑部郎中臣許兆椿覆勘

總校官檢討臣何思鈞

校對官中書臣陸湘

謄錄監生臣施華

欽定四庫全書

金佖粹編卷十五

宋岳珂編

家集六

奏議中

乞解軍務劄子

武勝定國軍節度使開府儀同三司湖北京西路宣撫使兼營田大使臣岳飛劄子奏臣竊謂事君者以能致其

身為忠居官者以知止不殆為義伏念臣受性愚戇起家寒微顧在身官爵之崇皆陛下識拔之賜苟非木石寧不自知每誓粉骨糜身以圖報稱然臣叨冒已踰十載而所施設未効寸長不惟曠職之可羞况乃微軀之負病蓋自從事軍旅疲耗精神舊患日昏新加脚弱雖不辭於黽勉恐有誤於使令願乞身稍遂於退休庶養痾漸獲於平愈比者修盟漠北割地河南既不復於用兵且無嫌於避事伏望陛下俯照誠悃曲賜矜從令臣

解罷兵務退處林泉以歌詠陛下聖德為太平之散民
臣不勝幸甚他日未填溝壑復効犬馬之報亦未為晚
臣無任激切戰懼俟命之至取進止

乞解軍務第二劄子

武勝定國軍節度使開府儀同三司胡北京西路宣撫
使兼營田大使臣岳飛劄子奏臣頃以多病易衰仰瀆
宸聽乞退處丘壠以便養痾伏蒙陛下未忍棄去尚闕
俞音不免控漑肺肝再攄悃愾今賢能輩出才智駢臻

干城腹心之士可付以軍旅者類不乏人則臣之所請無邀君之嫌今講好已定兩宮天眷不日可還偃武休兵可期歲月臣之所請無避事之謫臣不揆庸愚幸免此二事止以疾病餘生恐悞任使久享厚祿坐費太倉早夜以思身不遑處所以不避鈇鉞至於再而不自已伏望陛下垂溥照之明回蓋高之聽曲加仁惻洞照愚衷使一夫之微終遂其欲特許退休就醫藥臣不勝感戴聖德願望之至取進止

辭男雲特轉恩命劄子

武勝定國軍節度使開府儀同三司湖北京西路宣撫使兼營田大使臣岳飛劄子奏臣今月十五日准尚書省劄子十四日三省同奉聖旨岳雲可落閣職與轉武顯大夫遙郡刺史臣聞惟名與器不可以假人故循守資格自有常法必有非常之功而後有非常之賞如臣男雲始就義方尚存乳臭雖累經於行陣曾未見於事功比者仰蒙聖恩曲垂異眷超資躡等驟進官聯不惟

使雲志氣怠惰而臣益切滿盈之愧况臣既已仰竊國恩致身顯位固有僥冒之名矣今併與其子而僥冒其可乎伏望陛下揭離照之明體乾健之斷特賜睿旨追還告命庶使雲粗知官爵之難得勉力學業他日或能備効驅策受之未晚取進止

辭男雲特轉恩命第二劄子

武勝定國軍節度使開府儀同三司湖北京西路宣撫使兼營田大使臣岳飛劄子奏臣今月三日准尚書省

劄子奉聖旨以臣辭免男雲武顯大夫遙郡刺史不允
不得再有陳請者伏念臣遭遇宸眷倍於常倫初無顯
赫之功以稱褒崇之典又况臣男雲愚蠢無知消埃未
效疊蒙優渥以臣之故冒濫爵祿已為過分今若又寵
以異數使之叨據不唯使雲不知名器之重或就驕溢
上則負陛下之恩下則取搢紳之謗并臣之罪亦復難
逃伏望聖慈俯回天聽特賜追寢實為臣父子之幸臣
不勝激切震汗之至取進止

辭男雲特轉恩命第三劄子

武勝定國軍節度使開府儀同三司湖北京西路宣撫使兼營田大使臣岳飛劄子奏臣近兩具辭免臣男雲武顯大夫遙郡刺史准尚書省劄子奉聖旨依已降指揮不允不得再有陳請者恭讀之際愧汗交流伏念臣叨荷聖恩實倍倫等曲折之辭前已備述不敢喋喋上瀆天聽臣以辭免開府恩命重蒙玉音戒諭丁寧又不敢固違天意跼躅拜命已切悚惶今若并臣男雲無功

進職是臣辭榮而益榮避祿而邀祿也恩雖至厚公議
謂何伏望特簡淵衷俯回洞照特賜寢免庶安愚分取
進止

辭男雲特轉恩命第四劄子

武勝定國軍節度使開府儀同三司湖北京西路宣撫
使兼營田大使臣岳飛劄子奏臣先三具劄子辭免臣
男雲武顯大夫遙郡刺史恩命事今月二十一日准尚
書省劄子三省同奉聖旨依已降指揮不允不得再有

陳請臣聞正已然後可以正物自治然後可以治人臣奮身踈逝冒國寵榮陛下誤恩擢置重任以孱陋之資將軍旅之衆顧惟匪稱夙夜惶懼惟恐檢飭修者有所未至不足以服衆比者男雲未嘗立功遽遷優秩在臣私分實不遑處臣庸懦無能方將勉竭駑鈍仰圖報稱而自使其子受無功之賞則是臣不能正已而自治將何以率人哉伏望陛下憐臣拙直察臣愚衷早賜俞音收還成命容臣男他日大立戰功然後命之以官亦未

為晚所有官告一軸除已令本司簽廳牒鄂州於軍資
庫寄納外取進止

辭少保第三劄子

武勝定國軍節度使開府儀同三司湖北京西路宣撫
使兼營田大使河南北諸路招討使臣岳飛劄子奏臣
伏蒙聖恩除臣少保加食邑七百戶食實封三百戶臣
已兩具辭免今月初十日伏奉詔書不允者臣聞忠臣
之事君計功而受賞量力而受官不為苟得以貪爵祿

況師旅方興事功未著臣方同士卒之甘苦明將佐以
恩威冀成尺寸之功仰報君父之德豈可身被厚寵而
愬然不以當鋒刃冒矢石者為心哉所有少保恩命臣
實不敢祇受伏望陛下日月照臨乾坤覆載察臣肺腑
追寢異恩臣願憑陛下雷霆之威託宗廟山嶽之福罄
竭篤鉅期効消埃候將來功績有成臣將拜手稽首祇
承休命矣誠懇迫切至於再三冒天威臣不任戰慄
恐懼之至取進止

辭少保第四劄子

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛劄子奏臣昨蒙聖恩特降告命除臣少保加食邑七百戶食實封三百戶臣已三具劄子辭免今月初九日伏奉詔書不允不得再有陳請者臣聞爵以馭其貴祿以馭其富爵祿者人君馭天下英豪而使之貴富也人孰不欣受而願享之然名器假人為傳所譏無功受祿為詩所刺則

君不可以輕予臣不可以妄受臣性資樸魯久叨寵榮
每懼滿盈弗克負荷况乃孤棘實為異恩若更無功輒
有貪冒臣賦分謏薄竊恐別招譴責伏望陛下憐臣懃
懇特降俞音追還恩命庶使臣稍安愚分別効寸長仰
報陛下天地生成之德干冒斧鉞臣不任戰慄俯伏俟
命之至取進止

辭少保第五劄子

武勝定國軍節度使開府儀同三司湖北京西路宣撫

使兼營田大使河南北諸路招討使臣岳飛劄子奏臣
伏蒙聖恩特降告命除臣少保加食邑七百戶食實封
三百戶臣已四具劄子辭免八月三十日准尚書省劄
子三省同奉聖旨不允今日下祇受仍依累降詔旨不
得再有陳請者臣之事君義無有已若夫貪慕爵祿務
榮一身而不以國家為念則非臣之所忍為也比者金
人敗盟再犯河南之地赤子黎民迄無寧日臣方將策
駕礪鈍冀效尺寸以報陛下天地生成之德今則敵騎

寇邊未見殄滅區區之志未效一二臣復以身為謀惟貪爵祿則誠恐不足為將士之勸而報恩無所萬誅何贖伏望睿慈追寢成命特賜俞音姑詔有司留以為臣異時消埃之賞取進止

辭冊命劄子

少保武勝定國軍節度使湖北京西路宣撫使河南北諸路招討使兼營田大使臣岳飛劄子奏臣比准制命授臣少保累具辭免伏蒙聖慈降詔不允不得再有陳

請臣不避斧鉞之誅再露丹誠仰干天聽乞賜追寢又於今月初一日奉聖旨指揮閣門岳飛除少保累具辭免已降指揮不允日下祇受不得再有陳請可令便立新班特放告正謝臣已於今月初二日望闕謝恩祇受訖所有冊命恩數伏望睿旨許免以安愚分取進止

辭男雲特轉恩命劄子

少保武勝定國軍節度使湖北京西路宣撫使兼營田大使河南北諸路招討使臣岳飛劄子奏臣於今月二

十六日准告授臣男雲左武大夫忠州防禦使臣聞君之馭臣固不吝於厚賞父之教子豈可責以近功臣昨恭依睿筭與敵騎決戰於陳潁之間雲隨行迎敵雖有薄效殊未曾立到大功遽超橫列仍領郡防賞典過優義不遑處所有告命臣不敢令雲祇受伏望聖慈俯垂天鑒追還異恩庶使雲激勵懦庸別圖報效取進止

乞叙立王次翁下第一劄子

少保樞密副使臣岳飛劄子奏臣近蒙恩除樞密副使

已具懇辭未沐矜許伏奉聖旨令參知政事王次翁叙位在臣之下臣契勘參知政事叙位舊例在樞密副使之上臣雖謬忝孤卿豈得遽紊班列欲望聖慈令臣只依舊例叙位在參知政事之下庶使邦儀不易愚分可安取進止

乞叙立王次翁下第二劄子

少保樞密副使臣岳飛劄子奏臣契勘參政與樞副叙位朝廷自有定例豈可為臣忝竊孤卿叙位使在參知

政事之上不免再具誠懇仰瀆聖聽伏望睿慈曲垂照鑒許臣只依近例叙位在參知政事之下庶使庸愚不致僭越取進止

辭衣帶劄子

少保樞密副使臣岳飛劄子奏臣於今月二日正謝伏蒙聖恩依例賜臣對衣金帶魚袋鞍馬竊念臣一介么微遭過宸眷之厚近年累曾蒙恩賜金帶等物今更循例錫予在臣無能實為過分伏望睿慈特賜寢罷庶使

眷恩不致冒濫干瀆天聽臣不勝惶懼之至取進止

辭初除銀絹劄子

少保樞密副使臣岳飛劄子奏今月初九日御藥院官
衛茂實奉六月十三日聖旨以臣初除樞密副使依宰
臣例支賜銀絹各一千匹兩臣遭遇聖眷至厚至深既
擢任於樞庭又錫賚以多物內外情文靡所不盡陛下
所以待人臣之禮斯亦至矣然臣稟生奇蹇賦分寒薄
夙夜震驚恐不足以當陛下錫予之厚伏望聖慈俯垂

睿照收還所賜銀絹庶使稍安分量不至盈滿取進止
辭男雲除御帶劄子

少保樞密副使臣岳飛劄子奏臣於今月初九日准尚
書省劄子七月初八日三省同奉聖旨岳雲除帶御器
械伏念臣叨冒聖恩擢真樞府靜思無補已劇愧顏臣
男雲年少蠢愚未練官業今輒處以御帶之職實為親
近在臣寒微尤不遑處兼恐於法或有妨礙不免控瀝
危懇仰瀆聖聰伏望睿慈曲垂天鑒追還已降指揮庶

得稍安愚分取進止

辭男雲除御帶第二劄子

少保樞密副使臣岳飛劄子奏臣今月十二日准尚書省劄子奉聖旨以臣辭免男雲除帶御器械差遣不允臣竊以御帶之職至近冕旒非有干城之才可以任腹心之寄者不足以當其選臣男雲年少蠢愚殊未練達世務一旦驟遷此職實非駉幼所能陛下為官擇人豈當出此知子者父誠不皇安不免披露愚誠再干天聽

伏望睿慈追還雲上件差遣庶免人言少安愚分取進
止

辭初除銀絹第三劄子

少保樞密副使臣岳飛劄子奏臣近蒙指揮依宰臣例
支賜銀絹各一千匹兩臣已兩具劄子奏乞賜蠲免今
月十二日准尚書省劄子奉聖旨不允竊緣臣聚集口
累不至重大逐月請俸贍養有餘若更叨冒錫予至於
無厭則不知足之患深可為戒臣不免再具誠懇仰瀆

聖聰伏望睿慈俯垂天鑒特賜蠲免施行取進止

乞解樞柄第二劄子

少保樞密副使臣岳飛劄子奏臣已具劄子乞解罷樞密副使職事至今累日未蒙俞允竊念臣性識疎闇昧於事機立功無毫髮之微論罪有丘山之積加以望輕任重德薄寵殊荷聖眷之兼容在孤忠而益畏煩言嗇至私義奚安欲免累於明恩理合圖於亟去伏望睿慈察危情之難處施天造之曲成聽還印於樞庭許投身

於散地欲乞檢會臣前奏早降處分施行取進止

乞解樞柄第三劄子

少保樞密副使臣岳飛劄子奏臣已累具劄子乞解罷
樞密副使職事伏蒙聖恩降詔不允者露章待罪自驚
寵數之過優溫詔示恩猶悶俞音之下逮再陳愚懇仰
瀆淵聰伏念臣濫厠樞庭誤陪國論貪榮滋甚補報蔑
然豈惟曠職之可虞抑亦妨賢之是懼冀保全於終始
宜遠引於山林伏望聖慈察其誠心實非矯飾速降睿

旨許罷機政取進止

辭除兩鎮在京宮觀第二劄子

少保臣岳飛劄子奏臣今月十三日伏蒙聖恩賜臣少保武勝定國軍節度使充萬壽觀使告軸仍奉朝請臣已謝恩外緣臣見具劄子辭免已將告命寄納臨安府今月十四日伏奉詔命不允竊以兩鎮節旄國朝盛典非有大勲豈容輕授臣前此叨據常懼弗稱自惟智術短淺坐糜歲月攷其績用初無絲毫安可更爾冒榮矧

內祠之任得侍清光朝廷所以貴老尊賢用昭異數在
臣愚分非所宜處顧待遇之愈隆夙夜以思雖粉身碎
骨何以圖報萬一愧深汗溢感極涕橫重念臣才疎德
薄人微望輕若不自列濫當優寵必致顛隲上辜宸眷
欲望聖慈追寢成命除臣一在外宮觀差遣取進止

金佖粹編卷十五

欽定四庫全書

金佖粹編卷十六

宋 岳珂 撰

家集七

奏議下

廣德捷奏

武德大夫英州刺史御營使司統制軍馬臣岳飛狀奏
恭依聖旨將帶所部人馬邀擊金人至廣德軍見陣共

斫到人頭一千二百一十六級生擒到女真漢兒王權等二十四人并遣差兵馬收復建康府溧陽縣殺獲五百餘人生擒女真漢兒等軍同知溧陽縣事渤海太師李薩巴等一十二人金人回犯常州分遣兵馬等截邀擊掩殺四次見陣擁掩入河棄頭不斫生擒女真萬戶算卓貝勒漢兒李渭等一十一人委是屢獲勝捷謹錄奏聞伏候勅旨

鄧州捷奏

鎮南軍承宣使神武後軍統制江南西路舒蘄州蕪荆
南鄂岳黃復州漢陽軍德安府制置使臣岳飛狀奏契
勘叛賊李成與金人瑠和貝勒陝西等處各兵併聚於
鄧州西北劉三十餘寨臣遣發王貴等由光化路張憲
等由橫林路前去掩殺據統制王貴張憲等申七月十
五日離鄧州三十餘里逢敵兵共數萬接戰分遣王萬
董先軍兵出奇突擊其軍大潰降到金官楊德勝等二
百餘人奪馬二百餘疋衣甲不知其數內高仲將一項

殘零人馬走入鄧州閉門堅守十七日攻鄧州將士不
顧矢石蟻附而上破鄧州殺死一應人馬鏖戰大獲勝
捷為暑月疲勞見起發前去德安府歇泊聽候朝廷指
揮外謹錄奏聞伏候勅旨

復三州奏

鎮南軍承宣使神武後軍統制江南西路舒蘄州蕪荊
南鄂岳黃復州漢陽軍德安府制置使臣岳飛狀奏近
准指揮遣飛進發軍馬掩殺敵人兵馬於五月六日收

復隨州七月十七日收復鄧州二十三日收復唐州并
已收復信陽軍並已差官葺治屯兵防守已班師江上
歌洎謹錄奏聞伏候勅旨

湖寇捷奏

鎮寧崇信軍節度使神武後軍都統制荆湖南北襄陽
府制置使臣岳飛狀奏近差統制官任士安部押軍馬
前去闕
措置把截黃誠等賊馬去後據任士

安申五月五闕

偽太子渠魁黃誠等節次

前來侵犯永安寨其賊

闕

匹步軍二萬餘

人擺拽十餘里與官兵相拒鬪敵

闕

率親

兵并武功郎統領陳照人馬分路會合至永

闕

陣前來迎敵任士安引兵當頭衝擊賊徒敗走

奪

闕

粘蹤追襲過苟陂山殺死甚多奪到衣

甲器械捉到

闕

人馬見別具狀供申外委是大獲勝捷

謹錄奏聞伏候勅旨

復西京長水縣捷奏

起復檢校少保武勝定國軍節度使湖北京西路宣撫副使兼營田使臣岳飛狀奏據統制官王貴申遵依指揮差武經郎第四副將楊再興等統率軍馬前去收復西京長水縣去後今據申八月十三日進兵到長水縣界業陽逢偽齊順州安撫張宣贊下孫都統并後軍統制瑪展擁賊兵數千人拒敵當時分布軍馬掩擊賊衆殺死五百餘人生擒後軍統制滿在并徒衆一百餘人及當陣殺獲孫都統首級其餘殘黨盡皆奔潰再興遂

再進兵於今月十四日到本縣界孫洪闕再逢張宣贊

親率賊馬二千餘人隔河闕遂鼓率人馬關敵殺散

闕

日二更

闕

來

闕

復長水縣了當奪到

闕

石給散百姓官兵食用即時闕

無

分毫騷擾申乞照會謹錄奏聞伏候勅旨

復潁昌府奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏據前

軍統制同提舉一行事務張憲申統率軍馬前去措置
除於閏六月十九日離潁昌府四十里與金人見陣獲
捷外憲復統率軍馬追襲金帥韓常其軍大敗於當月
二十日收復潁昌府了當謹錄奏聞伏候勅旨

陳州潁昌捷奏

武勝定國軍節度使開府儀同三司湖北京西路宣撫
使兼營田大使河南北諸路招討使臣岳飛狀奏今據
諸軍申到收復下項

一據前軍統制張憲申將帶諸統制將官前去措置
陳州閏六月二十四日午時離陳州十五里逢敵
馬軍三千餘騎見陣掩殺其衆望城奔走遂分諸
頭項並進離城數里有敵將翟將軍等并添到東
京一帶差來軍馬擺布大陣憲遂鼓率將士分頭
入陣掩擊其軍敗走已收復陳州了當除殺死外
生擒到敵人王太保等并奪到鞍馬等委獲勝捷
一據踏白軍統制董先遊奕軍統制姚政等申統率

軍馬在潁昌府駐劄閏六月二十五日辰時有敵
兵取長葛縣路前來先即時同姚政等統率軍馬
出城迎敵到城北七里店逢鎮國大王并韓將軍
舍音貝勒人馬六十餘騎擺布成陣先與姚政等
分頭項徑入敵陣戰鬥及一時辰其軍敗走追殺
三十餘里除殺死外擒到人并奪到鞍馬等委獲
勝捷

右謹錄奏聞伏候勅旨

鄭州捷奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏據中軍統制王貴申先次遣將楊成等統率軍馬前去措置鄭州今據楊成等申於閏六月二十五日到鄭州南逢女真頭領滿都哈等部領軍馬五千餘人見陣成等遂鼓率將士與敵見陣掩殺其軍敗走收鄭州撫定了當委獲勝捷謹錄奏聞伏候勅旨

滿都哈捷奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏據本司中軍統制王貴申據准備將劉政等申將帶人兵於閏六月二十九日夜劫破中牟縣金人萬戶滿都哈營寨殺死敵兵不知數目奪到馬三百五十餘匹驢騾一百餘頭衣物器甲等不計數目即未知萬戶滿都哈存亡委獲勝捷申乞照會謹錄奏聞伏候勅旨

復西京奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏據本司中軍統制提舉一行事務王貴申尋差中軍副統制郝晟等統押軍馬前去措置收復西京去後今據郝晟等申進發至離西京六十里下寨於七月初一日有金人馬軍數千騎前來即時差將官張應韓清將帶馬軍於敵來路把截其軍前來迎敵官軍張應等即時掩殺

其軍敗走最進發軍馬當日酉時直湊西京城下其金
人為已敗劔當夜棄城逃遁於初二日早收復西京了
當已撫存官吏居民各安職業委獲勝捷謹錄奏聞伏
候勅旨

龍虎等軍捷奏

武勝定國軍節度使開府儀同三司湖北京西路宣撫
使兼營田大使河南北諸路招討使臣岳飛狀奏今月
初八日探得有敵中將帥四太子龍虎盖天大王韓將

軍親領馬軍一萬五千餘騎例各鮮明衣甲取徑路離
郟城縣北二十餘里尋遣發背蒐遊奕馬軍自申時後
與敵戰關將士各持麻扎刀提刀大斧與敵手拽廝劈
鏖戰數十合殺死敵兵滿野不計其數至天色昏黑方
始敵兵退那奪到馬二百餘匹委獲大捷謹錄奏聞伏
候勅旨

復南城軍捷奏

武勝定國軍節度使開府儀同三司湖北京西路宣撫

使兼營田大使河南北諸路招討使臣岳飛狀奏今月初十日據本司統制忠義軍馬孟邦傑申遵依指揮令措置收復南城軍邦傑尋遣差將官楊遇等將帶人馬收復據楊遇等申七月初闕日夜二更以來南城軍北角與金人交陣擁掩落水溺死敵衆不知其數并殺死敵兵三千餘人所有奪到鞍馬舟船器甲弓箭旂槍等別具狀供申外逼逐敵兵出城上船渡河至初闕日收復南城軍了當已撫存官吏居民各安職業委獲勝捷

申乞照會謹錄奏聞伏候勅旨

郾城縣北并垣曲等捷奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏今月初十日申時據巡綽馬報覆有敵人馬軍一千餘騎徑來侵犯郾城縣北五里店在後塵頭不絕不知數目臣躬親提領軍馬出城迎敵遣差背嵬將官王剛等將帶背嵬使臣五十餘人騎前去探敵據王剛等稱於五里

店見敵擺一字陣內見一名甲上着紫袍認是頭領遂一齊入敵軍併手斫下上件頭領其餘敵衆一發退走今於斫下屍首上并馬鬃上取到紅漆牌子二箇上題寫鄂爾多貝勒追趕敵騎二十餘里當日又據本司統領忠義軍馬梁興董榮申依准指揮統押軍馬前來過大河勦殺金兵占奪州縣興等於今月初一日晚到黃河南岍措置濟河其黃河北岸有金兵三十餘人騎於岸口擺列陣勢守備人馬興等於初二日早領兵與統

領董榮等人馬渡河到北岸敵騎就岍交戰其軍敗走
追趕入絳州垣曲縣閉門拒敵興等遂行張榜說諭不
肯歸降至午時興等領兵與統領董榮等人馬措置絞
縛雲梯一齊上城接戰殺死金人不知數目活捉到千
戶劉來孫等一十四人并奪到戰馬一百餘匹器仗等
見行撫存人戶安業依舊種作外申乞照會謹錄奏聞
伏候勅旨

小商橋捷奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏今月十四日本司前軍統制同提舉一行事務張憲申今月十三日統率背嵬遊奕并諸軍人馬起發前來小商橋北一帶至臨潁縣措置掩殺金兵於今月十四日天明據綽路馬報臨潁縣南逢金兵綽路馬遂追趕過縣三十餘里殺死兵馬不知數目其軍望潁昌府尉氏縣路前去委獲勝捷謹錄奏聞伏候勅旨

河北潁昌諸提奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏今月十五日據本司統領忠義軍馬梁興趙雲李進并董榮牛顯張峪申依准指揮將帶人馬過河占奪州縣掩殺金兵興等除已於七月初二日收復絳州垣曲縣了當已行供申外興等統押軍馬至七月初四日到孟州王屋縣界地名西陽邵源駐劄兩寨漢兒軍張太保等部

押手下漢軍人馬六十餘人前來投降至初五日辰時到王屋縣西地名東陽有駐劄北軍一寨為興等統兵前去其兵棄寨逃走當日午時統率軍馬到王屋縣敵騎為興等人馬逼近並已棄城逃走興等人馬不曾入城乘勢追趕敵騎二十餘里奪到戰馬八匹殺死敵兵三十餘人并奪到衣甲刀槍旂幟無數興等差人招誘王屋縣百姓首領王璋等五十餘人當面出給旂膀招集本縣逃走軍民着業去訖至初六日統兵到孟州濟

源縣西地名曲陽二十里以來逢金將高太尉兵馬五千餘人騎前來興等躬親統押人馬分頭前去迎敵與敵血戰自辰時及午時其軍大敗殺死金人一十餘里橫屍遍野并奪到器械槍刀旂鼓等無數及活捉到金兵八十餘人興等收兵歇泊下寨間至未時以來有高太尉再將到懷孟衛等州界發來兵馬一萬餘人騎分布前來興等對面擺陣相拒興等即時分布軍馬併力與彼迎敵不顧死生血戰自未至酉時勦殺金兵步

軍八分已上奪到戰馬驢騾二百餘頭匹活捉到金兵一百餘人追襲至縣西門其高太尉將帶殘零兵馬退走興等為官軍盡日見陣傷中數多遂統押軍馬前去本縣北十餘里地名燕川歇泊下寨委是大獲勝捷謹錄奏聞伏候勅旨

王貴穎昌捷奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏今月

十五日據本司中軍統制提舉一行事務王貴申依准
指揮統率諸軍人馬於潁昌府屯駐今月十四日辰時
以來有金將四太子鎮國大王并昭武大將軍韓常及
彼中萬戶四人親領銳兵馬軍三萬餘騎直抵潁昌府
西門外擺列貴遂令踏白軍統制董先選鋒軍副統制
胡清守城貴親統中軍遊奕軍人馬并機宜岳雲將帶
到背鬼軍出城迎戰自辰時至午時血戰數十合當陣
殺死萬戶一人千戶五人敵兵橫屍滿野約五百餘人

重傷敵人不知數目其奪到戰馬金鼓旂槍器甲等不計其數見行根刷續具數目供申次委是大獲勝捷謹錄奏聞伏候勅旨

臨頴捷奏

武勝定國軍節度使開府儀同三司湖北京西路宣撫使兼營田大使河南北諸路招討使臣岳飛狀奏據本司前軍統制同提舉一行事務張憲申今月十八日到臨頴縣東北逢金兵馬軍約五千騎分遣統制徐慶李

山寇成傳選等馬軍一布向前入陣與敵戰鬥其軍敗
走追趕十五餘里殺死敵兵橫屍滿野奪到器甲等無
數輕騎牽到馬一百餘匹委是大獲勝捷謹錄奏聞伏
候勅旨

金佗粹編卷十六

欽定四庫全書

金佖粹編卷十七

宋岳珂編

家集八

公牘上

乞淮東重難任使申省狀

武功大夫昌州防禦使通秦州鎮撫使兼知秦州岳飛
狀申照得飛近准指揮差飛充通秦州鎮撫使仰認朝

廷使令之意除已一面起發前赴新任外契勘金人侵
寇虔劉其志未艾要當速行勦殺殄滅全盡收復諸路
不然則歲月滋久為患益深若蒙朝廷允飛今來所乞
乞將飛母妻為質免充通秦州鎮撫使止除一淮南東
路重難任使令飛招集兵馬掩殺金兵收復本路州郡
伺便迺灑收復山東河北河東京畿等路故地庶使飛
平生之志得以少快且以盡臣子報君之節謹具申尚
書省伏乞鈞慈詳察特賜敷奏指揮施行謹狀

小貼子

飛今來所管官兵一面催發前赴新任如蒙
指允飛所乞即乞速賜指揮亦不敢仰干朝廷別
求添益軍馬伏乞鈞照

赴鎮畫一申省劄子

武功大夫昌州防禦使通秦州鎮撫使兼知秦州岳飛
劄子契勘飛承尚書省劄子三省樞密院同奉聖旨除
授通秦州鎮撫使兼知秦州今具條畫到合行事件下

項

一飛所統人馬見在常州宜興縣駐泊其本縣已是
闕乏錢糧無可應副飛見擇日起發前去之任竊
聞江陰鎮江見今全闕濟渡舟船兼飛所管官兵
老小數多若以見有舟船裝載半月不能渡絕切
慮軍兵闕食失所欲乞於平江府常州江陰軍等
處支撥糧米三二萬石應副即目未渡江以前食
用

一泰州全藉興化縣在水鄉多收稻穀以贍兵卒今

蒙已降一指揮從薛慶所乞隸屬承州泰興縣又
已割屬揚州魚契勘泰州舊有四縣內倚郭海陵
附近州城累遭烽火蹂踐全無所收如皋一縣臨
於大路所收不廣今來泰州一小郡難以却將兩
縣屬別州顯於軍民妨闕伏望詳酌將上件兩縣
依舊隸屬本州所貴軍民通便如蒙許允乞作特
旨行下恐於人情未便有妨應援

一本軍頭口老小正兵七萬餘人口飛差人前去體

探得通秦二州即日並無糧斛况糧斛猝急難以
擘畫飛體國不敢過有陳乞支給錢糧欲乞借支
兩浙淮南路鹽鈔一百萬貫逐旋還納鹽事司准

充鹽本

一飛見帶軍馬萬餘自春並不曾支給衣賜今來合
給冬衣之時今體訪得通秦州即日錢帛闕少本
州人兵尚無可支散切慮因此失所伏望詳酌體
念特賜於有錢絹官司或別州軍去處支給冬衣

一次貴免官兵赤露失所

右謹具申尚書省

并樞密院

伏候指揮

申劉光世乞兵馬糧食狀

武功大夫昌州防禦使通泰州鎮撫使兼知秦州岳飛
狀申飛昨奉聖旨指揮差充前件差遣於八月十五日
還至常州宜興縣於十八日起發前來抵赴新任二十
二日至江陰軍歇泊據探報金人見圍楚州飛遂逐急
權差統制王貴管押兵馬等船濟渡切慮遲滯有失事

機不免躬親先入秦州於二十六日夜二更到秦州城外承准八月十九日指揮令飛與趙鎮撫立犄角飛遂措置調發兵夫糧食并不住差人勾喚王貴等軍馬實緣舟船數少今月初九日方盡到秦州飛已差張憲權行守城見今大軍屯駐三塾與金人大寨不遠惟是新復建康之後所有士馬瘡痕尚新羸敝方甚兼自到任未及一旬芻茭糗糧一一窘乏本未能即從王事重以承楚之急甚於倒垂不可以頃刻安居理宜前進欲望

鈞慈捐一二十之衆假十餘日之糧令飛得激厲士卒
徑赴敵壘解二州之圍掃騷擾之迹下以裨相公之盛
烈上以寬主上之深憂不勝幸甚謹具申安撫相公使
司伏候指揮

申劉光世乞進兵狀

武功大夫昌州防禦使通秦州鎮撫使兼知秦州岳飛
狀申竊念飛以行伍賤隸辱知朝廷蒙被厚恩殞歿難
報每以為國家之難雖非所命猶當戮力矧承楚之事

危迫如許累准朝廷指揮催督此正飛等捐身徇義之
秋切緣王鎮撫林郭鎮撫仲威等並不見差撥軍馬前
來使司王統制雖聞已起發即目尚未知屯駐去處使
飛孤軍委實難以枝梧今月十二日准本州遞到今月
六日指揮飛除已遵稟外契勘金兵盤泊日久連破諸
鎮王鎮撫郭鎮撫等各斂兵自保其志已驕目即承楚
一帶民戶逃死別無擄掠易於攻卻據探報敵人急攻
楚州切恐萬一疎虞於淮南諸鎮利害不細飛已於今

月十五日具申使司去訖飛一面起發前往承州以來
措置勦殺外伏乞鈞慈特捐一二千之衆別差統制官
一員前來倚角庶立大功不致上誤國事謹具申安撫
相公使司伏候指揮

申審招安申省狀

親衛大夫建州觀察使神武副軍都統制權知潭州兼
權荆湖東路安撫都總管岳飛申契勘湖東路見今盜
賊嘯聚動以數萬李宏在岳州劉忠在湘陰曹成在道

州作過其餘寇盜不少除見措置勦殺外其間若有能
改行自新之人未委合與不合招安如許飛招安欲望
給降金字牌黃旗十副仍乞差使臣管押付飛交割謹

具申尚書省

并樞密院

伏候指揮

乞措置進兵入廣申省狀

親衛大夫建州觀察使神武副軍都統制權知潭州兼
權荆湖東路安撫都總管岳飛申契勘飛承樞密院劄
子奉聖旨指揮統率軍馬來湖東措置收捕曹成賊

馬飛尋依時起發及沿路不住差信實人到道州以來
體探上件曹成作為次第至三月三十日游兵到衡州
茶陵縣承諸處探報曹成已於三月二十七日起離道
州望全永州路前去緣茶陵縣至道州尚有六百餘里
飛未敢信憑遂領一行軍馬前來郴州桂陽監體度賊
馬的實動息於四月初八日到郴州管下永興界地名
橘水郊承郴州并桂陽監公文探知曹成賊馬分路逃
遁前去全永賀州界去訖至三月二十七日並已起離

道州盡絕本軍亦差人探得與諸處關報一同飛今部
領軍馬前去道州如到彼賊兵未遠即便尾襲追趕若
逃遁程途已遠其賊聞飛兵到必不敢前來拒敵飛欲
深往追趕又恐二廣不曾得朝廷指揮不肯應辦錢糧
必致闕誤兼近據潭州申劉忠掩殺馬友下統制王成
大潰竊恐馬友見飛已入湖東及曹成遁走又不能捍
禦劉忠賊馬以此心懷疑惑別致生事飛欲徑往潭州
安撫馬友訖先次措置勒殺劉忠等賊了當即乞前去

收捕曹成除已具錄奏聞外伏望特降指揮付飛遵依

施行謹具申尚書省

并樞密院

伏候指揮

小貼子

飛契勘曹成賊馬經由全永賀州界逃遁已

不住關報廣東西安撫使請為統率逐路軍馬照
應把截無致侵入二廣外伏望特降指揮下逐路
帥臣更切火急嚴緊把截施行伏候指揮

又小貼子

契勘湖東事體非輕飛出自寒微望輕材

薄今令權一路切恐不能稱任止乞依舊統制名

目前去追殺曹成仍乞先次行下二廣路令應副
一行錢糧仍乞一才幹官充隨軍運使專一措置
錢糧庶得常不闕誤

分揀吳錫韓京兩軍訖申省狀

親衛大夫建州觀察使神武副軍都統制權知潭州兼
權荆湖東路安撫都總管岳飛申契勘飛近奉聖旨差
權荆湖東路安撫都總管及統率馬友并本路李宏吳
錫韓京諸頭項軍馬前來措置掩殺曹成飛尋依應起

發已到湖東界其韓京元屯兵衡州茶陵縣吳錫在郴州兩項所管官兵多是老弱及湖東土人在內充數其實堪出戰人各不滿一千又緣不經戰鬥久在州縣屯泊全無紀律今來飛已將上件人馬除揀選不堪披帶人給據放散外將實堪披帶人數分撥付本軍諸將收管使喚訖謹具申尚書省

并樞密院

伏乞照會謹狀

乞廣西戰馬申省狀

親衛大夫建州觀察使神武副軍都統制權知潭州兼

權荆湖東路安撫都總管岳飛狀申恭奉聖旨指揮差撥飛軍馬前來措置收捕曹成賊馬其曹成近自道州起發部領賊衆於賀州界深山桂嶺竄立巢穴占據峻峻備敵官軍飛提兵到北藏嶺下寨其賊嚴備守隘飛料曹成騎兵頗多緣飛所管戰馬比之曹成數目十不及一遂遂急於廣西經略司省馬內借到三百匹乘騎出戰與曹成下王淵賊馬見陣約及數時殺散王淵了當其所借省馬為自廣西遠來料食不足例皆疲瘦及

見陣往來馳逐落崖倒死者一百八十四匹伏望特降指
揮將上件見管未還廣西馬數特許存留充神武副軍
出戰及更乞下廣西經略司支撥堪好馬五百匹付飛
使用謹具申尚書省

并樞
密院

伏候指揮

再論虔州平盜賞申省劄子

鎮南軍承宣使神武後軍統制充江南西路舒蘄州制
置使岳飛劄子契勘今年討捕虔吉州界盜賊山寨計
數百餘座其吉盜如彭鐵大李動天兩寨結連肆毒其

徒多至數萬侵犯江西湖南及以首領號為十大王桀
黠為甚虔盜如陳顥羅開十等四百餘黨自為頭首各
成寨柵其徒十餘萬衆結為表裏拒敵官軍尤為猖獗
恃賴山險侵犯數路廣東則循梅潮惠英韶南雄以至
廣州江西則虔州南安之雩都江東則建昌軍福建則
汀州邵武等皆為所攻劫縱橫往來者數年飛頌奉聖
旨提兵討之雖正當盛夏炎瘴交侵而一時將士奮不
顧身爭先用命以獲蕩平首領雖衆並就生擒一無遺

類向非賞罰明均何以使人盡力如此伏望朝廷特賜
詳酌將今來功賞依去年韓開府收捉福建范汝為恩
例施行庶使有以激勸兵將緩急可以倚仗謹具申尚

書省

并樞密院

伏候指揮

小貼子

契勘飛近蒙朝廷褒擢飛累具辭免不蒙俞

允即非欲夸大微勞以謀身計蓋恐朝廷將來別
有使喚庶得將士盡力區區之愚畢盡於此伏乞

鈞慈特賜詳察

襄陽探報申省狀

鎮南軍承宣使神武後軍統制江南西路舒蘄州蕪荆
南鄂岳制置使岳飛狀申據探到偽齊添差金兵并簽
軍見在新野龍陂朝陽襄陽縣并唐鄧州一帶屯駐大
段數多見一面竭力措置外謹具申尚書省
并樞密院伏乞
照會謹狀

金佖粹編卷十七